

নূতন উপনিবেশ)

“দময়ন্তীকথা” ও “সতুর মা” রচয়িত্রী
শ্রীমতী চারুবালা সরস্বতী প্রণীত ।

কলিকাতা

১৩২৬

মূল্য ছয় আনা

প্রকাশক—

শ্রীঅনাথনাথ মুখোপাধ্যায়

৫০নং বাগবাজার স্ট্রীট, ও ১১নং ক্লাইব রো
কলিকাতা ।

*Copyright Reserved by
the Publisher.*

শ্রীগোরাঙ্গ প্রেস,
প্রিণ্টার—শ্রীসুরেশচন্দ্র মজুমদার ।
৭১।১নং মির্জাপুর স্ট্রীট, কলিকাতা

সতুর মা

(গল্প পুস্তক)

কয়েকটি অভিমত—

“আমাদের অন্তঃপুরের মা-লক্ষ্মীরা যদি নির্বেশেষে সকল রকমের গল্পই গলাধঃকরণ না করিয়া এই শ্রেণীর গল্পের পক্ষপাতিনী হইলেন, তাহা হইলে দেশের মঙ্গল হইবে, এবং গল্পসাহিত্যের বিপথগামিনী গতি ক্রমে স্থপথে ফিরিবে। * * ‘সতুর মার’ জীবনগ্রন্থ যে প্রণালীতে লেখা হইয়াছে তাহার অভিনবতা অতি উপাদেয়। * * * যে তুলিতে অঁকা হইয়াছে সে তুলি নিপুণতার সহিত ব্যবহার করা যে-সে চিত্রকরের কাজ নয়, * * * ঐ তুলিতে পুষ্পচন্দন বর্ষিত হউক। * * *—“ভূ-প্রদক্ষিণ” প্রণেতা ব্যারিফটার শ্রীযুক্ত চন্দ্রশেখর সেন।

“* * * রচনা গুলিতে মৌলিকতা, বর্ণনা বৈচিত্র্য ও আন্তরিকতার সৌরভ আছে। বাঙ্গালীর ঘরে প্রতিদিন যে সব বেদনার কারণ দেখা যায়—সেই সব কারণের কয়টি লইয়া লেখিকা গল্পের মধ্যে শিক্ষার আদর্শ প্রদান করিয়াছেন। এমন গল্পের প্রচারে সমাজকে বুঝিবার সুবিধা হয়। * *”—বসুমতী।

“* * * গল্পগুলি স্থলিখিত ; আখ্যান ভাগ ভাগে এবং রচনাও অনাবশ্যক উচ্ছ্বাসের ভারে পীড়িত নয়। * * স্থপাঠ্য।”—
ভারতী।

“ * * গল্পগুলি অতি সুন্দর * * ভাষা * * আবিজতা বিহীন
মিষ্ট * * ”—কবিরাজ শ্রীযুক্ত প্রভাতচন্দ্র সেন কবিরঞ্জন ।

“ * * এই পুস্তকের সর্বশ্রেষ্ঠ সম্পদ একটি মধুর পবিত্র সংযত
ভাব। এইটাই বিশেষভাবে উপভোগ্য। পড়িলে লেখিকার প্রতি
জ্ঞান উদয় হয়। * * ”—উদ্বোধন ।

“ * * পাঠ করিয়া আমরা মুগ্ধ হইয়াছি। স্থানে স্থানে
অশ্রুবিসর্জন না করিয়া থাকিতে পারি নাই। * * * সতুর মার’
চরিত্রে গ্রন্থকর্ত্রী আমাদেরকে অমূল্য শিক্ষালাভের সৌভাগ্য ও সুযোগ
দান করিয়াছেন। * * বেশ সুখপাঠ্য ও স্বাভাবিক এবং চিত্তাকর্ষক
হইয়াছে। * * * ”—মানসী ও মর্ম্মবাণী ।

ইণ্ডিয়ান মিরর, কায়স্থ পত্রিকা প্রভৃতিতে বিশেষ ভাবে প্রশংসিত ।
ভাল এণ্টিক্ কাগজে পরিপাটী ছাপা ; সোনার জলে
নাম লেখা ; ভাল কাপড়ে বাঁধাই, ডবল ক্রাউন ১৬
পেজী, ২০৮ পৃষ্ঠা, মূল্য ১।০ মাত্র ।



নূতন উপনিবেশ ।

বর্ষাকালের রুষ্টি থামিয়াও থামিতে চায় না, আকাশ পরিষ্কার হইয়াও হয়না । একটু রোদ্দ দেখা দিয়াছে কি না দিয়াছে, অমনি খানকয়েক মেঘ জমা হইয়া আবার টুপ্‌টাপ্‌, দেখিতে দেখিতেই বুপ্‌বুপ্‌ বম্‌বম্‌ শব্দে বর্ষণ আরম্ভ করে ; যেন অভিমানিনী মেয়ে ঠোঁট দুখানি ফুলাইয়াই আছেন, কি হইল না হইল, কে কি বলিল না বলিল অমনি মুখখানি ভার করিয়া কাঁদিতে বসিলেন !

সবুজ লতা পাতা ঘাসের উপর প্রথম প্রথম সে কান্না বড় সুন্দর দেখায়, শুনিতে বেশ আমোদ বোধ হয়, সাধ্য সাধনা করিতেও ভাল লাগে, কিন্তু শেষে সে ঘ্যান্‌ঘ্যানানি আর ভাল লাগেনা, একশো বারই সেই একঘেয়ে টানাস্বর শুনিতে শুনিতে, সে ল্লান-মুখ দেখিতে দেখিতে বিরক্তি ধরিয়া যায়, তখন কেবল মনে হয় একটু থামিলে বাঁচি ।

নূতন উপনিবেশ ।

আজ স্নবোধের তিনটি ছোট ভাই বোনের তাহাই হইয়াছিল । প্রথমে যখন মঙ্গলবার দিন ঠিক তাহাদের স্কুলে যাইবার সময়টীতে মাথার উপর কয়েকখানা কাল মেঘ জমা হইয়া সূর্য্যকে ঢাকিয়া ফেলিয়া গর্জ্জন শব্দে প্রকৃতি দেবীর হাসিমুখ গম্ভীর করিয়া তুলিল, তাঁহার নীল নয়নের কোলে কোলে বৃষ্টির জল টল্ টল্ ছল্ ছল্ করিতে লাগিল ;—কয়টি ভাই বোনে উপস্থিত স্কুল বন্ধের আশায় আনন্দিত হইয়া তখন—“আয় বৃষ্টি চেপে, ধান দেব মেপে”— বলিতে কিছুমাত্র আলস্য করে নাই, কিন্তু তারপর যখন তিনদিন অনবরত বৃষ্টিতে চারিদিক ভিজি স্যাৎসেঁতে হইয়া গেল, রাতদিন ঝন্-ঝমানিতে কান কালাপালা হইতে লাগিল, ঘর হইতে বাহির হওয়া ভার হইল, একে একে সকলেরই মনে হইতে লাগিল, বিনাদোষে এমন ভাবে অন্ধকার ঝুপ্‌সি ঘরের মধ্যে বন্দী হইয়া থাকার চেয়ে স্কুলে গিয়া পড়া দেওয়া, এমন কি তাহা না পারিলে বেত খওয়াও শতগুণে ভাল, তখন সকলেই আবার বৃষ্টির পায়ে

নূতন উপনিবেশ ।

মাথা খুঁড়িয়া বলিতে বাধ্য হইল—“হে বৃষ্টি ছেড়ে যা, নেবুর পাতা করমচা,”—বৃষ্টি তাহাদের অনুরোধে কান দিলনা ; কেবল ঠাকুরমা তাঁহার আদরের নাতি নাতিনীরা বাদলার হাওয়া গায়ে লাগাইয়া জ্বরে পড়িবে এই ভয়ে সকল কাজ ফেলিয়া তাড়াতাড়ি নিজের হাতে তাহাদের খাওয়াইয়া দিয়া ঘুমাইতে বলিলেন । তখন রাত অল্প, কাহারও চোখে ঘুম আসে নাই, ইহারই মধ্যে বিছানায় যাইবার ইচ্ছা তাহাদের কাহারও ছিলনা ; তবু ঠাকুরমার কথা রাখিয়া কয়জনে কক্ষে স্রক্ষে চোখ বন্ধ করিয়া চুপ করিয়া বিছানায় পড়িয়া রহিল । বৃদ্ধ পিতামহী সহজেই ভাবিলেন তাঁহার রতনমণিরা ঘুমাইয়া পড়িয়াছে, সুতরাং আস্তে আস্তে তাহাদের বিছানা ছাড়িয়া উঠিয়া, মশারি ফেলিয়া, ঘরের আলো একটু কম করিয়া দিয়া, তিনি নীচে নমিয়া গেলেন ।

সুযোগ পাইয়াই শিশুরা একটু চঞ্চল হইয়া উঠিল । অমলা চোখ খুলিবার সঙ্গে সঙ্গেই মুখ খুলিল, কমলা সুধারও নীরব রহিল না । তিন ভাই

নূতন উপনিবেশ ।

বোনে ভয়ে ভয়ে চুপি চুপি দুই চারিটা কথা আরম্ভ করিয়াছে এমন সময় দরজায় ঘা পড়িল, সঙ্গে সঙ্গে কিসের একটা শব্দও শুনা গেল ।

ছোট ভাই সুধীর ভয় পাইয়া বড়দিদি অমলার কাছে আরো সরিয়া গিয়া বলিল—“ও কিসের আওয়াজ দিদি ?” দিদির উত্তরের আগেই বাহির হইতে আবার কে বলিল,—“বন্ধু ভয় করিও না, আমি, দরজা খোল ।”

“দেখাই যাক না, কে ? বলিয়া কমলা উঠিয়া দরজাটা একটু খুলিতেই, তাহাদের নবাগত বন্ধু ঘরের মাঝে আসিয়া, একটু হাসিয়া বলিল—“তোমরা কি আমায় চেন ? বলিতে পার আমি কে ?” তিন ভাই বোনে ঘাড় নাড়িয়া জানাইল—“না জানিনা ।”

অপরিচিত বন্ধু ঘরের পরিষ্কার ঠাণ্ডা মেঝের বসিয়া বলিল—“তোমরা আমায় না চিনিতে পার, কিন্তু আমি তোমাদের চিনি, শুধু চেনা নয় খুব ভালবাসি । তোমরা যখন কয় ভাই বোনে বই শ্লেট লয়ে নানা দেশের গল্প করিতে করিতে স্কুলে

নূতন উপনিবেশ ।

যাও, আমার ইচ্ছা করে আমিও ওই রকম সাদাসিধা পরিচ্ছন্ন বেশে শ্লেট বই লয়ে ঠিক তোমাদেরই মত একটা ছোট ছাতায় ঝড় বৃষ্টি হইতে মাথাটাকে বাঁচাইয়া, ইংলণ্ড, আমেরিকা, চীন জাপানের কথা শুনিতে শুনিতে তোমাদের সঙ্গী হইয়া স্কুলে যাই । বিকাল বেলার খেলার সময় তোমাদের সঙ্গে মনের আনন্দে খুব লাফালাফি করিয়া খেলি, রাত্রে যখন স্কুলের অর্ধেক পড়া তৈয়ার করিয়া লইয়া তোমাদের ঠাকুরমাকে ঘিরিয়া বসিয়া অবাক হইয়া সেকালের গল্প শোন, ইচ্ছা হয় আমিও তোমাদের পাশে বসিয়া অনেক রাত অবধি সেই সকল মনোহর কাহিনী শুনি ।”

তিন ভাই বোনে মুখ চাওয়া-চাওয়ি করিয়া ভাবিতে লাগিল—এ কে ? আগে আর কোনদিন কি আমরা একে দেখেছি ?

তাদের মনের ভাব বুঝিতে পারিয়া অচেনা বন্ধু বলিল—“তোমরা আমায় চেন না, জান না, এমন কি আমি তোমাদের নিতান্ত কাছে এসে দাঁড়ালেও

নূতন উপনিবেশ ।

একটিবার ফিরে চাওনা, তবু, তোমাদের আমি ভালবাসি বলে আমার অন্য বন্ধুরা, আমার আত্মীয় স্বজনেরা আমার শত্রুর খোশামুদে বলিয়া নিন্দা করে, কত ঠাট্টা তামাসা করে, কিন্তু তোমাদের তিন ভাই বোনের মধুমাখা কথা আমার কানে গেলে তোমাদের হাসিমুখ দেখিলেই সব ভুলে যাই । কোন মতেই তোমাদের আমি শত্রু বলিয়া মনে করিতে পারিনা, কিন্তু—”

তিন ভাই বোনের এই অচেনা বন্ধু আরও কি বলিতে যাইতেছিল কিন্তু মুখের কথা মুখেই রহিল, কি যেন দুঃখের কথা তাহার মনে পড়িয়া গেল, দু’ ফোঁটা চোখের জল যেন মাটিতে পড়িল, সে ব্যস্ত হইয়া অন্তদিকে মুখ ফিরাইয়া চুপ করিয়া রহিল, কিছুক্ষণ মুখে একটাও কথা বাহির হইল না ।

বিস্মিত হইয়া স্তম্ভীর তাহার মুখের দিকে চাহিয়া রহিল, অমলা ও কমলা দুই চারিটা মিষ্ট কথায় তাহাকে তুষ্ট করিয়া, সে কে ? কোথায় থাকে ? কি জন্ম এই বর্ষার রাতে অন্ধকারে জল

নূতন উপনিবেশ ।

কাদা ভাঙ্গিয়া তাহাদের কাছে আসিয়াছে ?—তাহা জানিতে চাহিল ।

অচেনা বন্ধু তখন ধীরে ধীরে বলিল—“তবে শোন বন্ধুরা, আজ তোমাদের তিন জনকে আমি আমার দুঃখময় জীবনের কাহিনী শুনাই, আর, কেন যে এই অন্ধকারে জল কাদা ভাঙ্গিয়া আজ তোমাদের কাছে আসিয়াছি তাহাও বলি ।

সে অনেক দিনের কথা । মায়ের কাছে শুনিয়াছি বন্ধু অমলা তুমি তখন ভাই নিতান্ত ছোট, চলিতে বলিতে কিছুই শিখ নাই, তখন তোমার শুধু দোলনায় শুইয়া কাঁদিয়া হাসিয়া নিজের অভাব আনন্দ প্রকাশ করিবার শক্তিটুকু হইয়াছিল মাত্র । কমলা ও সুধীর তখন জন্মায় নাই । সেই সময় ডাক্তারদের বাঁধা ঘাটের নীচে পুকুরের নরম ঠাণ্ডা শেওলার পাশে সরু একগাছি মালার মত হইয়া সাবুদানার আকারে আমরা হাজার কয়েক ভাই বোন একসঙ্গে শুইয়া-ছিলাম, তখন আমাদের সুখ দুঃখ বোধ করিবার শক্তি

নূতন উপনিবেশ ।

ছিল না, এমন সুন্দর এত বড় পৃথিবীটাকে দেখিবার চোখ ছিল না, আমাদের দেখিলে জড় কি চেতন তাই বুঝা যাইত না । মাঝখানে একটী কালো বিন্দু, আর বিন্দুটাকে ঘিরিয়া একটা চট্‌চটে সাদা আবরণ । ঠিক যেন কতকগুলি ভিজা তোকমারি একটীর পর একটী করিয়া সাজাইয়া আস্তে আস্তে জলের উপর ফেলিয়া রাখা হইয়াছে, উপরের সেই লালার মত চট্‌চটে আবরণটি না থাকিলে আমাদের ত একটু হাওয়া কি একটু খানি জলের তাড়ায় চারিদিকে ছড়াইয়া পড়িতে হইত, কিন্তু ঐ জিনিসটি আমাদের বিন্দু দেহকে চারিদিক হইতে এমন ভাবে ঢাকিয়া ও পরস্পরের সহিত যুক্ত করিয়া রাখিত যে ইচ্ছা করিলেও কেহ সহজে আমাদের কোন অনিষ্ট করিতে, একটীর নিকট হইতে আর একটীকে দূরে সরাইয়া দিতে পারিত না ।

মায়ের ভাগ্যদোষে আমাদের সেই নিরুপায় অবস্থায় একদিন জেলেরা পুকুর পরিষ্কার করিতে আসিয়া বিধাতার হাতে গাঁথা সেই মিনি সূতার

নূতন উপনিবেশ ।

মালাটী পুকুরের পানা ঝাঁঝির সঙ্গে তুলিয়া ফেলিয়া দিল। নিকটে থাকিয়াও মা আমার কোনমতে তাহাদের হাত হইতে সেটাকে রক্ষা করিতে পারিলেন না, চোখের নিমেষে সব নষ্ট হইয়া গেল ! কেবল 'আমি একখানা পানার নীচে পড়িয়া নাকি কোন গতিকে রক্ষা পাইয়াছিলাম। পাছে আমাকেও হারাইতে হয়, সেই ভয়ে মা আমায় বুকে করিয়া কয়দিন আহার নিদ্রা ছাড়িয়া একটা গর্তের কাছে লুকাইয়া রহিলেন ।

আমার জীবনের দ্বিতীয় অবস্থা পর্য্যন্ত আমি মায়ের কোলে লুকাইয়া রহিলাম। শুনিয়াছি আমাদের মধ্যে এ সৌভাগ্য নাকি আর কাহারও হয় না। যাহোক, কয়েক দিন পরে জীবনের আরও দুই একটী দুঃখজনক অসম্পূর্ণ অবস্থার পর একদিন আমাদের কাক-জ্যোতিষীর নিকট হইতে আমার শুভাশুভ জানিয়া দিন ক্ষণ দেখিয়া মা আমায় অনেক সাবধান করিয়া অনেক উপদেশ দিয়া বাহিরে আনিয়া একা ছাড়িয়া দিলেন। তখন আমার প্রথম ও প্রধান

নূতন উপনিবেশ ।

কাজ হইল নিজের খাবার খুঁজিয়া লওয়া । তখন ক্ষুধাও যেমন প্রবল, খাবারও তেমনি অজস্র, কিন্তু খাবার জিনিসের অভাব না থাকিলে কি হয়, শত শত্রুর হাত হইতে প্রাণ বাঁচাইয়া খাবারের খোঁজে যাওয়া আর ভাল মন্দ খাদ্য অখাদ্য চিনিয়া খাওয়া—সে এক বিষম ব্যাপার ; পেটে রান্ধসী ক্ষুধা, আর খালে বিলে, পুকুরে, জলার মাঝে রাশি রাশি টাটকা বাসি, পচা পাচ্কো কত রকমের খাবার জিনিস, দেখিয়া লোভ সাম্ভালানো যায় না ; আবার ঠিক বুঝিয়া খাইতে না পারিলে মরিতে হয় । কেননা ডিম হইতে বাহির হইবার পর হইতেই আমাদের খাওয়াটাই,—মরা পচা ছোট খাট পোকা মাকড়, উদ্ভিদ,—চোখের স্তম্ভে যা কিছু পাওয়া যায় নির্বিচারে গলাধঃকরণ করাটাই তখন আমাদের প্রধান কাজ । আমাদের সেই রান্ধসী বৃত্তিতে জলাশয় বিষমুক্ত ও পরিষ্কার হওয়ায় আর সকলের উপকার হয়, কিন্তু আমাদের পেটুকতা ও নির্বুদ্ধিতা আমাদেরই মৃত্যুর কারণ হয় । বলিতে কি আমাদের

তখনকার সেই আহারের ঠেলা সামলাইয়া যে কয়টা পারে বাঁচিয়া থাকে ।”

(২)

“জ্যৈষ্ঠ মাসের শেষে আমি যখন বহু কষ্টে দুবেলা সামান্য খাবারের যোগাড় করিতে শিখিয়াছি, সেই সময়, আমার মা ও কাকিমারা আবার হাজার কয়েক ডিম পাড়িলেন । ঝাঁঝির পাশে পাশে খুব ছোট ছোট গোল গোল দানার বড় বড় মালাগুলি জলের উপর ছড়াইয়া রহিল । কে জানে ইঠাৎ আবার কোনদিন জেলেরা পুকুর পরিষ্কার করিবার ছলে আসিয়া সব ডিমগুলি নষ্ট করিয়া ফেলিবে সেই ভয় ভাবনায় মা কাকিমারা সব শিউরে রহিলেন কিন্তু সৌভাগ্যক্রমে সেবার খুব শীঘ্রই বর্ষা নামিল, পথ ঘাট জলে কাদায় ভরিয়া গেল, খানা ডোবা হইতে ছোট বড় পুকুর গুলা কানায় কানায় পূরিয়া উঠিল । গ্রামে জ্বর দেখা দিল, আগে গায়ে হাতে ব্যথা, তারপর শীত, শেষে দারুণ কম্প দিয়ে

নূতন উপনিবেশ ।

ম্যালেরিয়া জ্বরে গ্রামের অনেককেই বিছানায় ফেলিল। ডাক্তারদের মৌসুম পড়িল, সহরের পাঁউরুটি বিস্কুট-ওয়ালা পল্লীতে দেখা দিল। দোকানিকে ঘি ময়দার চেয়ে সাবু মিছরির ওজনটাই দিনে বেশীবার করিতে হইল, খই, মুড়কি আর মিছরি বাতাসার দর সন্দেশ রসগোল্লার মত হইয়া উঠিল। কাজেই জেলেরা আর জলে নাবিয়া পানা ঝাঁকি তুলিতে সাহস করিল না। ভগবানের কৃপায় আমার ভায়েরা সে যাত্রা তাই বাঁচিয়া গেল। ক্রমে তাহাদের চোখ ফুটিল, ল্যাজ বাহির হইল। আমার লক্ষ লক্ষ ভাই বোন পুকুর পূর্ণ করিয়া ফেলিল। দু'চার দিনের মধ্যেই তাহারা খুব সাঁতারপটু হইয়া উঠিল, দেখিয়া আমাদের আহ্লাদের আর সীমা রহিল না! বন্ধু, জীবনে আমার সে কি আনন্দের দিন! বাদলের মেঘ আকাশ ছেয়ে ফেলিয়াছে, থাকিয়া থাকিয়া চিক্‌মিক্‌ কিক্‌মিক্‌ করিয়া বিদ্যুৎ হানিতেছে, সঙ্গে সঙ্গে গম্ভীর শব্দে মেঘ ডাকিতেছে, আর পৃথিবীকে ঠাণ্ডা করিয়া চাষার শস্তের ক্ষেতে আশীর্ব্বাদ ছড়াইয়া শ্রাবণের

নূতন উপনিবেশ ।

ধারা বর্ষ বর্ষ করিতেছে ; ডাক্তারদের বাগানের সদ্য ফোটা যুঁই, কামিনী, রজনীগন্ধা ফুলের সুবাসে পুকুর-ধারটি আমোদিত হইতেছে ; আর আমার মা, মামি, খুড়ি, জ্যাঠাই, মাসি, পিসি, দিদি, বৌদিদিরা সকলে মিলিয়া এক সুরে বর্ষা মঙ্গল গাইতেছেন, আর তারই তালে তালে আমরা অযুত লক্ষ ভাই বোন পুকুরের জলের উপর বৃষ্টির ফোঁটার নীচে ঘুরিয়া ঘুরিয়া নৃত্য করিতেছি।—আহা, সে কি সুন্দর কি সাধের নাচ ! এখন ভাবিলে মনে হয় সে যেন কোন্ এক আনন্দের রাজ্যের সুখের স্বপন !

আমোদে আহ্লাদে আমাদের পাঁচ ছয় দিন কাটিল । তারপর,—“ওঃ !” অমলার বন্ধু একটী দীর্ঘ নিশ্বাস ফেলিয়া একটু চুপ করিয়া থাকিয়া ভাঙ্গা গলায় বলিল “কে জানিত যে সেই আনন্দই আমাদের শেষ আনন্দ হইবে ?

কয়দিনের পর বৃষ্টি ছাড়িয়া গিয়া আকাশ পরিষ্কার হইয়া গিয়াছে ; চোখ ধাঁধান মেঘা-খেকো রোদ চক্চকে পালিস করা রূপার পাতের

নূতন উপনিবেশ ।

মত চারিদিকে ছড়াইয়া পড়িয়াছে ; পাখীরা সব ডানা ঝাড়া দিয়া গাছের ডালে বসিয়া গান সুরু করিয়াছে ; কয়দিনের পর রোদ পাইয়া ছোট ছেলে মেয়েরা মনের আনন্দে ছুটাছুটি খেলায় মাতিয়াছে । সেই সময় পাড়ার একদল গিন্নী, মেয়ে ও বোদের সঙ্গে করিয়া ঘাটে স্নান করিতে, জল লইতে আসিল । তা'দের হাতের তাড়া খাইয়া জলের ঢেউয়ের সঙ্গে আমরা (বয়সে বড়রা) গভীর জলে সরিয়া গেলাম, কিন্তু আমার শিশু ভাই বোনেরা নির্বোধের মত খেলা করিতে করিতে তাহাদের গায়ে কাপড়ে উঠিল, কতক বা জলের সঙ্গে তাহাদের ঘড়া গাড়ুর ভিতর গিয়া পড়িল । রোজই যেমন আসে তাহারা তেমনি আসিতে লাগিল, আমার ভাই বোনেরাও তাদের নিতান্ত চেনা লোক ভাবিয়া তাহাদের পায়ের নীচে, হাতের কাছে, কাপড়ের মাঝে ছুটিয়া ছুটিয়া খেলা করিতে লাগিল । অনেকটা ভয় ভাঙ্গা হইয়া গেল, কিন্তু হয়, হতভাগ্যরা তখন স্বপনেও ভাবে নাই এই ছেলে খেলা হইতে তাহাদের কি সর্বনাশ হইবে ।

নূতন উপনিবেশ ।

আর আমরা বুঝিতে পারি নাই ওই ঘোমটা টানা বোঁগুলো মনে মনে তাদের উপর বিরক্ত হইয়া কি বিষম শাস্তির আয়োজন করিয়াছে ।

সকালে ঘুম হইতে উঠিয়া আমার শিশু ভাই বোনেরা জলে সাঁতারকাটিয়া খেলা করিতেছে, মা, খুড়িমা প্রভৃতি বাড়ীর মেয়েরা ঘরকন্নার কাজ আরম্ভ করিয়াছেন, বাবা, কাকা প্রভৃতি কৰ্ম্মক্ষম পুরুষেরা পোকা মাকড়ের সন্ধানে দিকে দিকে বাহির হইয়াছেন । আমার সেদিন শরীরটা বড় ভাল ছিল না বলিয়া কোথাও যাই নাই, আমার পিসতুতো ভাই ‘আসাপা’ গাছে বসিয়া তাহার ফেঁকাসে রংঙের লম্বা লম্বা হাত দুখানি নাড়িয়া বলিতেছিল, আগের দিনে একটা বক বাঁড়ুঘ্যেদের পুকুরে শিকার করিতে গিয়া কেমন করিয়া নিজেই একটা বড় শালমাছের শিকার হইয়া পড়িয়া চীৎকার করিতে করিতে উড়িয়া গাছে বসিয়াছিল ! আমি গাছের তলায় বসিয়া সেই বক মহাশয়ের মজার শিকার কাহিনী শুনিতেছি এমন সময় মনে হইল দূরে পুকুরের ভিতর হইতে

নূতন উপনিবেশ ।

আমাদের বাড়ীর সকলে যেন এক সঙ্গে কাঁদিয়া উঠিল ।

বাগানের পথ দিয়া এক নিশ্বাসে ছুটিয়া গিয়া দেখি—সর্বনাশ ! পাড়ার সেই বোঁগুলো দল বাঁধিয়া আসিয়া এক হাঁটু জলে নামিয়া এক একটা চুপড়ি দিয়া আমার ছোট ভাই বোনগুলিকে ছাঁকিয়া তুলিয়া ছুড়িয়া ছুড়িয়া ফেলিয়া দিতেছে ! আহা, সেই কচি শিশুদেহে সে বিষম আঘাত সহ করিতে না পারিয়া হতভাগ্যরা একজন আর একজনের উপরে পড়িয়া মৃত্যু যাতনায় ছট্‌ফট্‌ করিতেছে ! মায়েরা সকলে হাহাকার করিয়া কাঁদিতেছেন । বড় দিদিরা চীৎকার করিয়া কাঁদিতে কাঁদিতে স্নেহের ভাই বোনদের প্রাণ বাঁচাইবার জন্ত বৃথা ছুটাছুটি করিতেছে । রাগে দুঃখে পাগলের মত হইয়া শত্রুদের হাত হইতে তাহাদের বাঁচাইবার জন্ত জলের উপর ঝাঁপাইয়া পড়িলাম ।

আমার মরণাপন্ন ভাই বোনেরা ‘সোনাদাদা বাঁচাও’ ‘এদের হাত থেকে আমাদের রক্ষা কর

সোনাদাদা’—বলিয়া কাতরস্বরে চারিদিক হইতে
আমায় ডাকিতে লাগিল ।

আমি প্রাণপণ চেষ্টা করিয়াও তাহাদের বাঁচাইতে
পারিলাম না, একই মুহূর্ত্তে দশ-বারখানি হাত
• আমাকে ধরিবার জন্ত উদ্যত হইল । আমি কিছুক্ষণ
যোঝাযুঝির পর কুরুক্ষেত্রের যুদ্ধে সপ্তরথি-ঘেরা
অভিমন্যুর মত ঘাটের সিঁড়ির উপর অজ্ঞান হইয়া
পড়িলাম ।

কিছুক্ষণ পরে জ্ঞান হইল, কিন্তু আমি আর
উঠিতে পারিলাম না । আমাদের সেই দুঃখজনক
অবস্থা দেখিয়া দুঃখবোধ না করিয়া কতকগুলি ছেলে
মেয়ে হাততালি দিয়া নিষ্ঠুর-হাসি হাসিয়া উঠিল ।
সে হাসি আমার বুকে শেলের মত বিঁধিল, আর
সেই সময় তাহাদের মাথার উপর গাছে একটা
টিকটিকি পড়িল । সেই তুচ্ছতম সরীসৃষপটাও যেন
মানবশিশুকে লজ্জা দিয়া ঘৃণার সহিত বলিয়া উঠিল
—“ধিক্ ! ধিক্ ! ধিক্ !”

আমাকে একটু নড়িতে দেখিয়া বৌদের মধ্যে

নূতন উপনিবেশ ।

একজন—‘ও ভাই ওটা মরেনি ! এখনও মিচকে সয়তান মটকা মেরে পড়ে আছে’—বলিয়া আমার জীবনটুকু নিঃশেষ করিবার জন্ত একখানা ইট আনিতে গেল । আর একজন বললে ‘থাক্ থাক্ ওকে আর মারে না, ওর জন্ত ত আর আমাদের জ্বালাতন হ’তে হয় না ? ঘাটে আসিয়া সারাদিন যাহারা জ্বালাতন করিয়া মারিত, তাহাদের চারভাগের তিন ভাগকে নিকাশ করা গিয়াছে, চল এইবার ঘরে যাওয়া যাক্ ।’

এক গা গহনা পরা একটা বড় মানুষের বৌ বলিল—‘না না ওকেও মেরে ফেল । বেটাদের এক্ষেয়ে টানাসুরে চাঁচানির জ্বালায় রাত্রে ঘুম হয় না ; হতভাগাদের দেখ্-মার্ক করিলে তবে রাগ যায় ।’

যে বোঁটি ইট আনিতে ছুটিয়াছিল, মস্ত একখানি থান ইট লইয়া ফিরিয়া আসিয়াছে, আমি আমার অভাগী মায়ের বন্দনা ভাবিতে ভাবিতে হতাশ ভাবে মরণের জন্ত প্রস্তুত হইতেছি, সেই সময় তোমার মা—আহা, যেন মূর্ত্তিমতী দয়া—‘ওকি দিদি নিরীহ

নূতন উপনিবেশ ।

প্রাণীকে অমন করে মেরনা মেরনা' বলিতে বলিতে তাহাদের মাঝে হাঁ-হাঁ করিয়া আসিয়া পড়িলেন । তাহার হাতের ইট হাতে রহিল, কেহ আর আমার দিকে এগিয়ে আসিতে সাহস করিল না । পুকুর পাড়ের ইট-পাটকেল, ভাঙ্গা ঝিনুক গুলির উপর আমার ভাই বোনদের রাশিকৃত মৃতদেহ দেখিয়া দস্যু-প্রকৃতি নিষ্ঠুর বৌগুলোকে তিনি ছি ছি করিতে লাগিলেন, আর আমার গায়ে আস্তে আস্তে জলের ছিটা দিয়া আমায় বাঁচাইলেন । বন্ধু কমলা তোমার মায়ের হাতের সেই জলের ছিটাগুলি ক্রমে আমার চেতনা, শক্তি, সাহস একে একে ফিরাইয়া আনিল । তাঁহার সেই যত্নের জন্ম তাঁহার পায়ে লুটাইয়া পড়িয়া আমার কৃতজ্ঞতা প্রকাশ করিতে ইচ্ছা হইতে লাগিল । তাঁহার সে দিনের সে দয়ার কথা আমি জীবনে কখনও ভুলিব না, আর যতদিন আমার দেহে প্রাণ থাকিবে ভগবানের কাছে তোমার মায়ের আর তোমাদের মঙ্গল কামনা করিব ।

রাত্রে যখন সকলের খাবার জন্ম বিস্তর পোকা

নূতন উপনিবেশ ।

মাকড় মশা মাছি সংগ্রহ করিয়া বাবা ও কাকারা হাসিমুখে ঘরে ফিরে এলেন, আমাদের পুকুর-ঘর তখন একেবারে আনন্দশূন্য নিস্তব্ধ ।

খুড়ী জ্যেষ্ঠাইমাদের চোখের জল তখনও শুকায়নি, বুড়ী ঠাকুমা অসহ্য শোকে জ্ঞানহারা হইয়া পাঁকে মুগ্ধ গুঁজড়ে পড়িয়া আছেন । মা পাষাণে বুক বাঁধিয়া আমাকে কোলে করিয়া, আমার দেহের যে যে স্থান কাটিয়া গিয়া ভয়ানক ব্যথা হইয়াছিল, বনচালদার পাতা বাটিয়া সেই সেই স্থানে দিয়া বাঁধিয়া দিতেছেন । আমি জ্বরের ঘোরে কখন কাঁদিতেছি, কখন হাসিতেছি । কখনও বা মারু মারু করিয়া চীৎকার করিয়া উঠিতেছি ।

সকালে যাহাদের হাসি খেলা দেখিয়া বাহির হইয়াছিলেন সন্ধ্যায় ঘরে ফিরিয়া তাহাদের এই অবস্থা দেখিয়া, বাবা ও জ্যেষ্ঠা খুড়াদের মনের ভাব কিরূপ হইল বুঝিতেই পার, ব'লে আর কি জানাব ?”

অপরিচিত বন্ধুর পুরান দিনের দুঃখের কথা মনে করিয়া চোখে জল আসিল ।

দীর্ঘ নিশ্বাস ফেলিয়া শিশুরা জিজ্ঞাসা করিল—
“বন্ধু তারপর ?”

বন্ধু বলিল—“আমার অবস্থা খুব খারাপ হইলেও
দয়াময় ঈশ্বরের আশীর্ব্বাদে সে যাত্রা আমি বাঁচিয়া
গেলাম । ক্রমে আমাদের ভাঙ্গা সংসার আবার
ধীরে ধীরে গড়িয়া উঠিতে লাগিল, হাসি খুসীতে দিন
কাটিতে লাগিল । সংসারে আগেকার স্ত্রী আবার
ফিরিয়া আসিল । আগেকার দুঃখের কথা আমরা
একরকম ভুলিয়াই গেলাম । আমার নিজের বোন
ছিল না, জ্ঞাতি ভগিনীরা সুপাত্রে হাতে পড়িয়া
মানুষের ঘরের কোণ আশ্রয় করিয়া মনের সুখে
দিন কাটাইতে লাগিল । আমার বাবা ও জ্যেষ্ঠা
খুড়ার সকলেই বুড়া হইয়াছিলেন, নিয়মিত আহার
সংগ্রহ করিতে যাইতে পারিতেন না । আমরা
পাঁচদিক হইতে পোকা মাকড় ধরিয়া আনিয়া
তাহাদের দিতাম ।

একদিন ভায়েদের সঙ্গে এক বোঝা ছোট ছোট
পতঙ্গ লইয়া বাড়ী ফিরিতেছি,—শুনিতে পাইলাম,

নূতন উপনিবেশ ।

মোট ভুঁড়িওয়ালা লোক একজন আমার দিকে চাহিয়া বলিল—“ইস্ ব্যাটা রাশ রাশ পোকা মাকড় খেয়ে মুটিয়েছে দেখ! এখন যদি ওর কলিজাটা পাই কলার ভিতর করিয়া সেই হাঁপানি রোগীটাকে খাওয়াইয়া দেখি তার সে বিষম রোগ ভাল হয় কিনা।’

কথাটা শুনিয়াই আমার বুকটা কেমন ছাঁত করিয়া উঠিল। ভায়েদের আগাইয়া দিয়া নিজে একটু হন্ হন্ করিয়া চলিতে লাগিলাম।

ঘরে আসিয়া মাকে বলাতে মা বলিলেন ; “হ্যাঁ হ্যাঁ শুনিয়াছি বটে আমাদের কলিজাটা কাটিয়া তিন ভাগ করিয়া তিনদিন কলার ভিতর করিয়া হাঁপানী রোগীকে খাওয়াইলে তাহার রোগ ভাল হয়, মানুষেরা একথা বলিয়া থাকে। তা যা হোক বাছারা ও পথ দিয়া আর যাস্নে, কে জানে কোন্ দিন কার হাতে বিপদে পড়িতে হইবে। একেই আমার ভাঙ্গা কপাল, ভালয় ভালয় তোদের কয়টাকে রাখিয়া এখন মরিতে পারিলে বাঁচি।”

নূতন উপনিবেশ ।

মায়ের মানা শুনিয়া আমরা আর সে পথে
গেলাম না ।”

(৩)

“শরৎকাল, আকাশ পরিষ্কার, দিনটী বড় সুন্দর,
আমার মনটীও প্রফুল্ল । আমার পিসিমার ছোট
জামাই ঘাঁহাদের ঘরের কোণে বাসা লইয়া ছিলেন
তঁাহাদের বাড়ী খুব ঘটার দুর্গাপূজা হয় । আমার
ছোট বোন তাই দেখিবার জন্য আমায় কয় দিনের
নিমন্ত্রণ করিয়াছিলেন । আমি সেখান হইতে পূজার
ধুমধাম দেখিয়া শুনিয়া, পূজার বাড়ীতে ভাল মন্দ
পাঁচটা জিনিস খাইয়া খুসী মনে বাড়ী ফিরিতেছি,—
দেখি পথে একটা লোক চলিয়া যাইতেছে, তাহার
মাথার উপর প্রকাণ্ড একটা বুড়ি । বুড়ির ভিতর
হইতে যেন গোঁ গোঁ শব্দ আমার কানে গেল ।
পেটুক ঘেমন করিয়া সন্দেশের দিকে চায়, লোকটা
আমার দিকে তেমনি ভাবে চাহিতে চাহিতে চলিয়া
গেল । দুর্দান্ত ডাকাতের মত কদাকার লোকটার

নূতন উপনিবেশ ।

সেই চাহনি দেখিয়া আমার সর্বদ্বন্দ্ব জ্বলিয়া গেল ।
কিন্তু হায়, তখন আমি ভ্রমেও ভাবি নাই যে সেই
লোকটাই সাক্ষাৎ যম হইয়া আসিয়া আমাদের
সর্বনাশ করিয়া ফিরিয়া যাইতেছে !

পুকুরধারে পা দিয়াই দেখি—আমার বাড়ীর
সকল মেয়ে পুরুষ এক সঙ্গে জলের উপর আছড়া
আছড়ি করিয়া চীৎকার স্বরে কাঁদিতেছে । বিপদের
খবর পাইয়া আমার ভগ্নীপতিদের মধ্যে অনেকেই
ছুটিয়া আসিয়াছেন । মা আমার কিছুতেই প্রবোধ
মানিতেছেন না, সন্তানদের শোকে তাঁহার বুক
ফাটিয়া যাইতেছে । আমায় দেখিয়া দ্বিগুণ জোরে
কাঁদিয়া উঠিয়া বলিলেন, ‘বাছারা, এ হতভাগীর গর্ভে
জন্মে তোদের এই দুঃখ । এবার মরিয়া যেন নিঃ-
সন্তান হই ; চোখের সামনে বার বার ছেলে মেয়ে-
দের এত কষ্টের মরণ যেন আর দেখিতে না হয় ।
হায় হায়, বাছাদের আমার কি কষ্টেই প্রাণ বাহির
হইয়াছে । হে ভগবান, দয়া করে আমাকেও নাও
আর সহ্য হয় না ।’

শোকের বেগ অসহ্য হওয়ায় মা অজ্ঞান হইয়া পড়িলেন ।

ইহা আর কিছু নহে, পথে যাহাকে দেখিয়া-
ছিলাম সেই পাষণ্ড পাগলা গারদে বেচিবার জন্ত
সেই প্রকাণ্ড বুড়ি ভরিয়া আমার অনেকগুলি ভাই
বোন কাকা কাকিমা প্রভৃতিকে লইয়া গিয়াছে ।
তাহাদের মাংসের ঝোল রান্ধিয়া পাগলা গারদের
পাগলদের খাওয়াইবে । কর্তা গিন্নীদের মধ্যে আমার
জ্যেষ্ঠা, বাবা, ঠাকুমা ও মা ভিন্ন আর সকলকেই
মুখে কাপড় বাঁধিয়া লইয়া গিয়াছে ! রাগে, দুঃখে,
শোকে আমি যেন পাগলের মত হইয়া উঠিলাম ।
আমার সর্ব্বাঙ্গ থর থর করিয়া কাঁপিতে লাগিল ।
আমাদের উপর সাপ ও মানুষের অত্যাচার জন্মাবধি
দেখিয়া আসিতেছি ; অনেক সহ্য করিয়াছি । কিন্তু
আর নয়—জগত শুদ্ধ লোক জানে আমরা দুর্ব্বল,
নিরীহ, প্রবলের অত্যাচার আমরা মুখ বুজিয়া সহ্য
করি । কিন্তু হাজার দুর্ব্বল বা নিরীহ হই, সহ্যেরও
ত একটা সীমা আছে । রাগে দাঁতে দাঁত ঘসিয়া

নূতন উপনিবেশ ।

সকলকে বলিলাম—‘দেখি আজ হইতে এক বৎসরের মধ্যে যদি তোমাদের নিরাপদ করিতে, সকলের অত্যাচার হইতে রক্ষা করিতে পারি তবে ঘরে ফিরিব, নহিলে এই শেষ, এ জগতে সোনা নামের চিহ্নও থাকিবে না ।’

কাহারও দিকে না চাহিয়া, কাহারও কথায় কান না দিয়া ভয়ঙ্কর একটা আগুনের গোলার মত বেগে আমি বাহির হইয়া গেলাম ।

(৪)

দিন নাই রাত নাই অনাহারে অনিদ্রায় অনেক কষ্টে গ্রাম, নগর, নদী পার হইয়া আমি এক গভীর জঙ্গলে আসিয়া পড়িলাম । বাসূরে, সে কি ভয়ানক ঘন জঙ্গল ! দিনের বেলাও সেখানে রোদের মুখ দেখিতে পাওয়া যায় না । গাছ পালার ফাঁকে ফাঁকে কোথাও একটু আধটু আলো আসে, তা সে আলোতে অত বড় জঙ্গলের অন্ধকার যায় না । সেখানে যাইবার সময় অতটা বুঝিতে পারিনাই কিন্তু বাহির

হইবার সময় দেখি মহা বিপদ । যত যাই গভীর বনের মাঝে ঢুকিরা পড়ি, বাহিরে যাইবার পথ আর পাই না । অনেকক্ষণ ছুটাছুটির পর আমি হতাশ ভাবে বসিয়া পড়িলাম ।

দেখিতে দেখিতে সেই বনের অঁধার গাঢ়তম করিয়া রাত্রি আসিল । তখন শুধু ঝাঁ ঝাঁ পোকাকর ঝাঁ ঝাঁ রব, সাপের ফোঁসফোঁসানি, আর মাঝে মাঝে জোট ছোট জন্তু জানোয়ারদের এধার ওধার আনাগোনার আওয়াজ ছাড়া আর কিছু কানে যাইতেছিল না, চোখেও কিছু দেখিবার উপায় ছিল না । ভাগ্যিস সে বনে বাঘ সিংহের বাস ছিল না, তাই রক্ষা, নহিলে তাহাদের গর্জ্জন শব্দে ভয়েই ত প্রাণ বাহির হইয়া যাইত ।

যাহোক দুঃখে কক্ষে রাত্রিটা ত কোন রকমে কাটিয়া গেল । তখন সাহসে ভর করিয়া আবার সেই বন হইতে বাহিরে যাইবার পথ খুঁজিতে উঠিলাম, ভগবানের দয়া হইল, পথ মিলিল, বহু কক্ষে সন্ধ্যার একটু আগে জঙ্গলের বাহিরে আসিয়া হাঁফ ছাড়িলাম ।

নূতন উপনিবেশ ।

যত কষ্টই হোক, যত দুঃখই পাই, উদ্দেশ্য ভুলি নাই । দিনের পর দিন রাত্রির পর রাত্রি পরিশ্রম করিয়া, নানা স্থানে যাইয়া, নানা বন জঙ্গল ঘুরিয়া সুন্দর একটা উপনিবেশের স্থান ঠিক করিলাম ।

তারপর, মানুষের অত্যাচারে যারা যারা ব্যতিব্যস্ত, সেই সব প্রাণীদের একত্র করিবার জন্ত আবার ছুটিলাম ।

চেষ্টার অসাধ্য কিছুই নাই । কিছুদিনের চেষ্টায় এমন অনেককেই খুঁজিয়া বাহির করিলাম যাহারা আমার ইচ্ছামত একটা উপনিবেশ স্থাপন করিবার জন্ত আমার সঙ্গে হাসিমুখে দিনরাত খাটিতে রাজি হইল । তাহাদের সহিত আমি প্রাণপণে খাটিয়া, —সকলে স্বচ্ছন্দে বাস করিতে পারা যায়, যাহার যাহা দরকার সে সকলের কোন অভাব না হয়, বাহিরের কোন শত্রু হঠাৎ আসিয়া কোন অনিষ্ট করিতে না পারে, এমন ভাবে সেই বনটা জুড়িয়া স্থান প্রস্তুত করিলাম । যেখানে বেটীর দরকার,

নূতন উপনিবেশ ।

কত দূর দূরান্তর হইতে বহু কষ্টে সেখানে সেটা
আনিয়া রাখিলাম ।

দেখিতে দেখিতে নূতন উপনিবেশ মানুষের
অত্যাচারে ব্যতিব্যস্ত লক্ষ লক্ষ ইতর প্রাণীতে
ভরিয়া গেল ।

আমি আমার চেফ্টার সফলতায় খুসী হইয়া
হাসিমুখে আমার আপনার জনদের আনিবার জ্ঞাত
সেই পুকুরে আবার ফিরিয়া আসিলাম ।

অত্যন্ত পরিশ্রম ও ভাবনায় আমার চেহারা এত
খারাপ হইয়া গিয়াছিল যে নিতান্ত আপনার লোক
না হইলে কেউ আমায় চিনিতে পারিত না । মা
আমার চেহারা দেখিয়া হায় হায় করিয়া উঠিলেন ।

আমি তাঁহাকে প্রবোধ দিয়া বলিলাম—“ভয়
নাই মা, কিছু ভয় নাই, আমি ভালই আছি ।”

(৫)

“অতি সাবধানে শত্রুদের দৃষ্টি এড়াইয়া বনের
পথ দিয়া আমি সকলকে লইয়া চলিয়াছি । বাতাসে

নূতন উপনিবেশ ।

পাতাটী নড়িতেছে, কুটাটী পড়িতেছে ত চমকিয়া উঠিতেছি । আমাদের চিরশত্রু সাপের ভয়ে আমার বুক কাঁপিতেছে ।

মা, বাবা, জ্যেষ্ঠা ও ঠাকুমাকে সকলের মাঝে লইয়া চারিদিকে নজর রাখিয়া আমি আগে আগে পথ দেখাইয়া চলিয়াছি । হঠাৎ দেখি সেই ঘোর অন্ধকারের ভিতর হইতে আগুনের ফিল্কির মত কাহার আঁটটা চোখ যেন আমাদের দিকে বেগে ছুটিয়া আসিতেছে ।

ভয়ে আমার ‘আত্মপুরুষ’ শুকাইয়া গেল । ভাবিলাম ত্রিভুবনে এক পিতামহ ব্রহ্মা ভিন্ন আর কোন দেবতা মানুষ বা ইতর প্রাণীর আঁটটা চোখ আছে বলিয়া ত শুনি নাই । তবে কি বাপ পিতামহের ভিটা ছাড়িয়া বহু দিনের বাস উঠাইয়া চলিয়া যাইতেছি বলিয়া উনি আমাদের ভয় করিতে আসিতেছেন ?

আগুনের ফিল্কিগুলা আরো নিকটে আসিতেছে দেখিয়া আমি ভয়ে তিন হাত পিছাইয়া পড়িলাম,

আমার ঠেলা খাইয়া যাহারা আমার ঠিক পিছনে ছিল তাহাদের মাথায় মাথায় ঠোকাঠুকি হইয়া গেল । আমি যাহা দেখিয়া ভয় পাইয়াছিলাম আমার ভায়েরাও তাহা দেখিতে পাইয়া চীৎকার করিয়া উঠিল । সেই সময়ে শুনিতে পাইলাম কে গম্ভীরস্বরে জিজ্ঞাসা করিল—‘তোরা কে রে ? রাত্রে এই বনের পথ দিয়া যাস্ ?’

সে ভীষণ স্বরে আমাদের প্রাণ কাঁপিয়া উঠিল । চাহিতে সাহস হইল না, দুহাতে চোখ ঢাকিয়া মনে মনে হরিকে ডাকিয়া বলিলাম—‘হে অনাথনাথ হরি, দুর্বল অসহায়দের রক্ষা কর ।’

আবার সেই বিকট স্বর আমাদের কাণে গেল । মনে হইল যেন আমাদের ঠিক সামনে সে আসিয়া পড়িয়াছে । ভয়ে ভয়ে চোখ খুলিয়া দেখি অন্ধ কেহ নয়—বিকট আকারের বড় বড় চারটে বুনো কুকুর আমাদের পথ আগুলিয়া দাঁড়াইয়াছে,—আর তাহাদেরই আটটা চোখ রাত্রির অন্ধকারে আগুনের ফিল্কির মত জ্বল জ্বল করিতেছে । যদিও তখন

নূতন উপনিবেশ ।

আমি ভয়ে নিতান্ত কাতর হইয়াছিলাম তবু সকলের মুখ চাহিয়া সাহসে ভর করিয়া তাহাদের পায়ে লুটাইয়া জোড়হাতে মিনতি করিয়া আমাদের পথ ছাড়িয়া সরিয়া দাঁড়াইতে বলিলাম ।

তাহাদের মধ্যে দুটী আমার কথায় কান দিল না, একটী বলিল ‘সারাদিন আজ আমাদের খাওয়া হয়নি ক্ষুধায় অস্থির হইয়াছি, হাতের কাছে যখন পাইয়াছি চারজনে আজ তোদের মাংস খাইয়াই ক্ষুধা শাস্তি করিব ।’ তাহার কথা শেষ না হইতেই আর দুটীতে আমাদের মাঝে লাফাইয়া পড়িবার উদ্যোগ করিল, আমি নিমিষের মধ্যে তাহাদের সামনের পা দুটী জড়াইয়া ধরিয়া কঁাদিতে কঁাদিতে বলিলাম—‘যদি এ হতভাগাদের নিতান্তই প্রাণে মার, আগে আমাকে খাইয়া ফেল তারপর যাহা হয় করিও, আর দোহাই তোমাদের আমার ঠাকুরমা ও ছোট ভাইটাকে খেও না ।’

চারটীতে এক সঙ্গে বলিয়া উঠিল ‘হাঁ হাঁ তাই হবে তাই হবে । সেই ভাল, এই বেটাকেই আগে



খাওয়া যাক তাহলে আর কেউ এমন মায়া কান্না কেঁদে বাধা দিতে পারবে না ।’

তবুও আমি নিরাশ হইলাম না, নিজের প্রাণের আশা ছাড়িয়া আর সকলকে বাঁচাইবার জন্য অনেক কাকুতি মিনতি করিলাম কিন্তু তাহাদের কঠিন প্রাণ কিছুতেই নরম হইল না । চোখের জলে ভাসিয়া ভাবিলাম হায় হায় এততও নিষ্ঠুরদের দয়া হইল না ; দয়াময়ের রাজ্যে কি তবে দয়া বলিয়া কিছুই নাই ! জগতের সমস্ত জীবের প্রাণে আমাদের মত হতভাগাদের জন্য একটুও স্নেহ নাই ? সকলের দিকে চাহিয়া হতাশভাবে বলিলাম—তোমাদের ভাল করিতে গিয়া মন্দই করিলাম, আমার বুদ্ধিতে আজ তোমাদের সকলকে এক সঙ্গে প্রাণ হারাইতে হইল ! হা অদৃষ্ট !

এক সঙ্গে সকলে হাহাকার করিয়া কাঁদিয়া উঠিল । খাইবার জন্য কুকুরেরা আমায় ধরিতে উদ্যত হইয়াছে, সেই সময় দলের ভিতর হইতে আমার মা দৌড়িয়া আসিয়া তাহাদের পায়ে ধরিয়া কাঁদিয়া

নূতন উপনিবেশ ।

বলিলেন ‘বাছারা! নিতান্তই যদি আমাদের খাও, ঈশ্বরের দিব্ব একবার আমার জীবন কাহিনীটা দয়া করিয়া শুন তারপর ইহাদের আগে আমাকে খাও ।’

কি ভাবিয়া আবার তাহারা বিকট স্বরে বলিল,—‘তবে বল্ দেৱী করিস নি, দেৱী করিলে আর কোন কথা না শুনিয়া আমরা এক সঙ্গে সব কটাকে খেয়ে সাবাড় করিব ।’

মা ভয়ে কাঁপিতে কাঁপিতে তাঁহার দুঃখময় জীবনের কাহিনী বলিতে লাগিলেন । আমরা যেন মরণের অপেক্ষা করিয়াই সকলে স্তব্ধ হইয়া রহিলাম । আর ঠাকুমা সেই ভয়ানক বনে অন্ধকারের মধ্যে বসিয়া একমনে বিপদভঞ্জন হরিকে ডাকিতে লাগিলেন । তিনি ভিন্ন এ বিপদে আর কে রক্ষা করিবে ?

জানিনা কেন আমাদের কাহিনী শুনিতে শুনিতে ক্রমে তাহাদের উগ্রমূর্ত্তি অনেকটা শান্ত হইয়া আসিল । প্রথম দুটী মায়ের দিকে চাহিয়া বলিল—

‘যা বুড়ী যা আর কাঁদিসনি, তোর জঁন্তুই আজ এরা
বাঁচিয়া গেল ।’ শেষের দুটী বলিল ‘মনে করিসনি
তোর দুঃখ কাহিনী শুনিয়াই ছাড়িয়া দিলাম, মানুষের
অত্যাচারে বিব্রত হইয়া লোকালয় ছাড়িয়া পলা-
ইতেছিস শুনিয়াই তোদের আর কিছু বলিলাম না ।
আমরা যদিও বনে স্বাধীনভাবে আছি, আমাদেরই
অনেক জ্ঞাতি ভাই মানুষের বাড়ীতে আছে । তাহা-
দের মুখে শুনিতে পাই সমস্ত দিন বাঁধা থাকিয়া,
একবেলা খাইয়া, সারারাত জাগিয়া বাড়ী চৌকি
দিতেছে, প্রাণপণে তাহাদের ধন প্রাণ রক্ষা করি-
তেছে ; কোন কোন জায়গার পুলিশে বিনা মাহিনায়
চাকরী করিয়া বড় বড় চোর ডাকাত খুনিকে ধরিয়া
দিতেছে ; দারুণ শীতে কনকনে বরফের উপর দিয়া
গিয়া বরফের ভিতর হইতে আধমরা মানুষকে টানিয়া
বাহির করিয়া সন্ন্যাসীদের আশ্রমে লইয়া গিয়া
বাঁচাইতেছে ; ভয়ানক সমুদ্রে নিজের প্রাণের মায়া
ছাড়িয়া সাঁতরাইয়া গিয়া প্রভুর আজ্ঞা পালন করি-
তেছে ; মনিবের ভেড়ার পাল রক্ষা করিতে গিয়া

নূতন উপনিবেশ ।

প্রাণপণে বাঘের সঙ্গে লড়াই করিতেছে ; মনিবের ছেলে মেয়েকে বাঁচাইবার জন্ত গোখরো কেউটের কামড়ে প্রাণ হারাইতেছে ; কেনা চাকরের মত সারা জীবন শত রকমে প্রভুর সেবা করিতেছে, তবুও, নিষ্ঠুর মানুষ তাহাদের কুকুর বলিয়া ঘৃণা করিতে ছাড়ে না, একটু দোষ পাইলেই আচ্ছা রকম শাস্তি দিতে ভোলে না । বেশী কথা কি ? এমন এমন দেশও আছে যেখানে মানুষ কুকুরের কাছ থেকে সেবা নেয় কিন্তু অশুচি হইবার ভয়ে তাহাদের ছোঁয়া না, দৈবাৎ ছুঁইয়া ফেলিলে কাপড় কাচিয়া বা স্নান করিয়া শুদ্ধ হয় । সবচেয়ে মন্দ ও বেহায়া মানুষকে তাহারা কুকুর বলিয়া গালি দেয় । কত আর বলিব ? আমাদের জ্ঞাতি ভাইদের উপর এই সকল অত্যাচারের কথা শুনিয়া আমরাও মানুষদের উপর খুব চটিয়া আছি । তোমরা যদি কোন দিন ইহার প্রতিশোধ দিবার সুবিধা করিতে পার আমাদের খবর দিও, আমরাও কিছু সাহায্য করিব ।’

কুকুরেরা আর কিছু না বলিয়া আমাদের কৃত-

নূতন উপনিবেশ ।

ভ্রতা জানাইবারও অবসর না দিয়া, আহার অশেষণে
বনের অন্য দিকে ছুটিয়া গেল ।

(৬)

আমাদের তখনও একেবারে ভয় ভাঙ্গে নাই,
কাঁপিতে কাঁপিতে আমরা সামনে পা বাড়াইলাম,
খানিক দূর যাইতেই আবার এক বিপদ । পথের
পাশে সাপের ফোঁসফোসানি শুনিয়া সকলে ভয়ে
আড়ম্ব হইল, আর এক পা অগ্রসর হইবার সাহস
কাহারও রহিল না । আমি সকলের রকম দেখিয়া
মহা ভাবনায় পড়িলাম । একলার প্রাণ নয় যে
ছুটিয়া পলাইব, সকল গুলিকে লইয়া প্রবল শত্রুর
হাত হইতে পালান বড় সহজ নয় । তাহা ছাড়া
একটু আগেই একটা বিপদে পড়িয়া সকলেই
অনেকটা সাহসহীন হইয়া পড়িয়াছে । এক টানে
এতটা পথ চলিতে চলিতে পায়ের জোরও কমিয়া
আসিয়াছে । তবু আমি হতাশ হইলাম না ; সকলকে
সাহস দিয়া বলিলাম—ভয় কি ? যদিই এসে পড়ে,

নূতন উপনিবেশ ।

একটা সাপ ত আর আমাদের সকলকে একেবারে
এক গ্রাসে গিলিতে পারিবে না ; কোন মতে
একটাকে মুখে করিলে কিছুক্ষণ তাকে ফেলিতেও
পারিবে না সহজে গিলিতেও পারিবে না, দাঁতে
আটকাইয়া যাইবে ; সেই তকে আমরা সবাই পালা-
বার পথ খুঁজিব ; আর, কোন সাড়া শব্দ না করিয়া
চুপি চুপি যদি চলিয়া যাইতে পারি, হয়ত সে
জানিতেও পারিবে না। চল, ভয় করিয়া এক জায়গায়
দাঁড়াইয়া থাকিও না। বিপদের সময় ভয় না
করিয়া সাহসের সহিত বিপদ হইতে মুক্ত হইবার
চেষ্টা করাই বুদ্ধিমানের কাজ।

*

*

*

কোথাও একটু না থামিয়া, একটু না জিরাইয়া
লাফাইতে লাফাইতে আমরা ভোরের সময় আমাদের
নূতন উপনিবেশে আসিয়া পৌঁছলাম। এতক্ষণে
আমার সকল কষ্ট সার্থক হইল। সকলের মুখে
হাসি দেখিয়া মনে সাহস দেহে বল আরও বাড়িল।

নূতন উপনিবেশ।

আমাদের দেখিয়া আমার নূতন উপনিবেশের বন্ধুরা
আনন্দে জয়ধ্বনি করিয়া উঠিল।

যাঁহার দয়ায় এত বিপদ কাটাইয়া আমরা
এমন নিরাপদ স্থানে আসিয়া পৌঁছিতে পারিলাম
সেই দয়াময় জগৎপতির চরণে প্রণাম করিয়া, আমরা
আমাদের হেলাফুলে ঘেরা, পদ্মফুলে ভরা নূতন
পুকুর-ঘরে গিয়া বসিলাম। ছোট ছেলে মেয়েরা
এতক্ষণে জল পাইয়া আহ্লাদে লাফাইয়া উঠিল।
উপনিবেশের বন্ধুরা আমাদের জন্ত অনেক পোকা
মাকড় জড় করিয়া রাখিয়াছিল তাহাই আমাদের
খাহতে দিল। এইখানে তোমাদের বলিয়া রাখি,
আমাদের জিভ, আর খাইবার ধরন বড় মজার।
তোমাদের মত আমরা আমাদের খাদ্য হাতে করিয়া
মুখে তুলিয়া দিই না, গোত্রাসেও খাই না, আবার
পাখীদের মত ঠোঁট দিয়া ঠোক্রাইয়া ঠোক্রাইয়া বা
ইন্দুর আরস্ত্রলা প্রভৃতির মত কুরিয়া কুরিয়া খাই
না। আমাদের জিভ সহজে ও শীঘ্র শিকার ধরিয়া
মুখে পুরিবার এক অভূত যন্ত্রবিশেষ। তোমাদের

নূতন উপনিবেশ ।

জিভ যেমন ভিতর দিকে আটকানো আর সামনের দিকে আলগা, ইচ্ছামত বাহির করিতে বা মুখের ভিতর টানিয়া লইতে পার, আমাদের জিভ ঠিক তার বিপরীত । সাপের জিভের মত আমাদের লম্বা চেরা জিভ মুখের ভিতর দিকে আলগা আর সামনের দিকে আটকানো থাকে । খাদ্য নজরে পড়িলেই জিভটী একবার উল্টাইয়া মুখের বাহিরে আনিয়া তাহার উপর ফেলিতে পারিলেই হইল, আর সে যায় কোথায় ? যেমন জিভটী তাতে ঠেকা আর জিভের ডগায় যে চটচটে লাল থাকে সেই লালায় আটকাইয়া নিমেষে মুখের ভিতর গিয়া পড়া ! খাদ্য সম্মুখে আসিয়া পড়ার যা দেৱী ভোজনে আমাদের কিছুমাত্র দেৱী লাগে না, সে চোখের পলক ফেলিতে না ফেলিতে শেষ হইয়া যায় । আহাৰ শেষে আমরা ঘুমাইতে গেলাম । আঃ, সে কি আরামের ঘুম !

(৭)

তিন দিন তিন রাত্ৰের পর সেই ঘুম ভাঙ্গিল ।
উঠিয়া দেখি নূতন উপনিবেশের সকলের সঙ্গেই

নূতন উপনিবেশ ।

আমার বাড়ীর সকলের বেশ আলাপ পরিচয় হইয়াছে, মনের আনন্দ চোখে মুখে ফুটিয়া পড়িতেছে । স্বাধীনতা স্থখে এই তিন দিনেই যেন সকলের চেহারা ফিরিয়া গিয়াছে । শুনিলাম ঠাকুমা আমার বাবাকে বলিতেছেন ‘বাছা আজ তোর ছেলে সোনা হতে আমরা স্বাধীন হইতে পাইলাম । তাই লোক সৎপুত্রের কামনা করে । অসৎ পুত্র হইতে যেমন দুঃখ ও মনকষ্ট পাইতে হয়, সৎপুত্র হইতে তেমনি বাপ মা জীবনে সুখী হয় আর পরকালে স্বর্গ পায় । আহা, সোনা আমার বেঁচে থাক, একশ বছর পরমায়ু হোক, যাহা কখন ভাবিতেও পারি নাই সোনার কল্যাণে আজ আমাদের সে সৌভাগ্য হইল ।”

অমলার নূতন বন্ধু থামিল । তাহার চক্ষু দুটী আনন্দে উজ্জ্বল হইয়া উঠিল ।

অমলা জিজ্ঞাসা করিল—“তারপর ?”

বন্ধু বলিল—“তারপর আর কি, সেই অবধি আমরা নিরাপদে সেখানে স্বাধীন ভাবে বাস করিতেছি । অনেক দিন হইল ঠাকুমা স্বর্গে গিয়াছেন ।

নূতন উপনিবেশ ।

তাঁহার ছেলেরা আর আমরা তাঁহার নাতিরা মিলিয়া খুব ঘটা করিয়া শ্রাদ্ধশাস্তি করিয়াছি । ঠাকুমার, শ্রাদ্ধ সে আবার এক মস্ত কাহিনী । যদি শুনিতে চাও ত আর একদিন বলিব । জ্যেষ্ঠা মহাশয় তাল-সাল হইয়া বাঁচিয়া আছেন । মা বাবাও খুব বুড়ো হইয়া থপ্‌থপে হইয়া পড়িয়াছেন । তাঁরা আর ঘর-সংসারের কিছু করিতে পারেন না, আমাদের হাজার-কত ভায়ের লক্ষ-কয়েক ছেলে মেয়ে লইয়া বসিয়া আদর আহ্লাদ করেন । স্ত্রী আমার খুব মনের মত, রূপের চেয়ে তাহার গুণই বেশী । নূতন উপনিবেশের সকলেই তাহার গুণে মুগ্ধ, মিষ্ট কথায় বশ ।”

অমলা আনন্দিত হইয়া বলিল—“তবে বন্ধু তুমি এখন বেশ সুখে আছ ?”

বন্ধু উত্তর করিল—“হঁ। ভাই প্রথম জীবনে অনেক দুঃখ কষ্ট সহ্য করিয়া ভগবানের আশীর্ব্বাদে আমি এখন খুব সুখী হইয়াছি ।”

“কিন্তু সে যা’হোক, জীবন কাহিনী বলিতেই ত

নূতন উপনিবেশ ।

সময় গেল যে ক্ষণ আমি তোমার কাছে আসিয়াছি
তাহা ত বলা হইল না বন্ধু ?”

অমলা বলিল—“তাইত ! সে কথা জিজ্ঞাসা
করিতে ত আমি ভুলিয়াই গিয়াছি ।”

অমলার বন্ধু বলিল—“আগামী রবিবারে
আমাদের নূতন উপনিবেশে নূতন মহাসভার প্রথম
অধিবেশন হইবে ; দেশ বিদেশ গ্রাম নগর ও বন
হইতে ইতর প্রাণীরা আসিয়া এ মহাসভায় যোগ
দিবে । ইহারই মধ্যে অনেকে আসিয়াছে আরও
আসিবে । আর সকল বন্দোবস্তই ঠিক হইয়াছে
কেবল তোমাদের একটু সাহায্য পাইলেই কাজ
আরম্ভ করিতে পারি ।”

অমলা আশ্চর্য্য হইয়া বলিল—“বন্ধু আমাদের
হতে তোমাদের কি সাহায্য হইবে তাই ?”

বন্ধু হাসিমুখে উত্তর করিল—“তোমাদের হ'তে
কি সাহায্য হবে ? তবে শোন—জগৎপাতা
জগদীশ্বরের নিম্নে পৃথিবীর মধ্যে আমরা সমস্ত ইতর
প্রাণী এক মানব জাতিকেই আমাদের সম্রাট বলিয়া

নূতন উপনিবেশ ।

মানি । তোমরা আমাদের মনে বড় কষ্ট দাও
বলিয়াই সময়ে সময়ে আমরা তোমাদের কাছ থেকে
দূরে চলিয়া যাইতে চাই ; কিন্তু তোমরা যদি আমাদের
সঙ্গে ভাল ব্যবহার কর, আমরা ইতর প্রাণী
হইলেও আমাদের প্রাণ নাই সুখ দুঃখ বোধ নাই
মনে না কর, যদি এটা মনে রাখ যে ইতর বা
মহৎ যেই হোক প্রাণী মাত্রেরই সমান প্রাণ আছে
সুখ দুঃখ বোধ করিবার শক্তি আছে—রাগ দুঃখ,
আনন্দ কৃতজ্ঞতা প্রকাশ করিবার সকলেরই আলাদা
আলাদা ভাষা আছে, কেবল তোমাদেরই তাহা
বুঝিবার মত বুদ্ধি ও ক্ষমতা নাই, তাহা হইলে
তোমরা দেখিতে পাও আমরা জগতে তোমাদের
যত ভক্তি করি ও ভালবাসি এমন আর কাহাকেও
নয় । সেইজন্য আমাদের বড় ইচ্ছা তোমাদের মধ্যে
একজনকে আমাদের সভার প্রথম সভাপতি করি ।
বন্ধু অমলা ! তুমি যদি আমার কথা রাখিয়া সভাপতি
হও আমরা বড় খুসী হব ।

স্বধীর তোমাকেও ভাই অভ্যর্থনার ভারটী

নূতন উপনিবেশ ।

লইতে হ'বে। আর বন্ধু কমলা আমি শুনেছি তোমার গলা খুব মিষ্ট। সভা আরম্ভে তোমায় 'একটি গান করতে হ'বে। আশা করি, আমার এ অনুরোধ রক্ষা করতে কুণ্ঠিত হ'বে না।”

- নূতন বন্ধুর অনুরোধ শুনিয়া তিন ভাই বোনে কিছু চিন্তিত হইল। একটু পরে বড় বোন অমলা বলিল “বন্ধু তোমার অনুরোধে খুব খুসী হ'লাম, কিন্তু ভাই আমরা ত কখন সভা সমিতিতে যাই নাই, হয়ত খতমত থাইয়া বোকা বনিয়া বসিয়া থাকিতে হ'বে। তা'ছাড়া তোমার সঙ্গে আমাদের এই প্রথম আলাপ তোমার নাম কি? কোথায় তোমাদের উপনিবেশ? কোন্টা তোমার বাড়ী; এ সকল কিছুই জানি না, ইঠাৎ কেমন করিয়া যাইব? এবারের মত মাপ কর ভাই, অন্যবারে আমরা যাইব।”

“হাঃ হাঃ হাঃ—আমার নাম জাননা, বাড়ী চেননা তাই ভাবিতেছ? তোমাদের গোয়ালের গরুকে, পুকুরের মাছেদের জিজ্ঞাসা করিলে তাহারা যে তখনি বলিয়া দিবে!”

নূতন উপনিবেশ ।

অমলা আশ্চর্য্য হইয়া বলিল “সে কি ! তাহারা কেমন করিয়া জানিবে ? তাহারা কি তোমায় চেনে ? কোনদিন কি তাহারা তোমার বাড়ী গিয়াছে ?

বন্ধু উত্তর দিল—“আহা, তবে আর বলিতেছি কি ? ঠিক তোমাদের গরুটী না থাক্ তার আত্মীয় স্বজন বন্ধু বান্ধবরা ত অনেকেই সভায় যোগ দিবার জন্য গিয়াছে, যাহারা বাকি আছে সেইদিনে সব যাবে, মাছেরা প্রায় সকলেই গিয়াছে । যায়গায় যায়গায় এখনও যাহারা আছে, তাহারাও সেদিন যাবে ।

তোমরা চারিদিকে মাছ নাই মাছ নাই শুনিয়াও বুঝিতেছ না, তারা তোমাদের দেশ ছাড়িয়া কোথাও গিয়াছে ? বলিতে কি, মাছেদের উপর তোমরা বড় বেশী অত্যাচার কর । তোমাদের মাছের লোভটা এত বেশী যে কিছুতেই অল্পে মন উঠেনা এমন মাছ নাই যাহা তোমরা খাও না ; ছোট্ট মেতি চুনো থেকে আরম্ভ করিয়া রুই, কাতলা, শাল, বোয়াল, বান, এমন কি কড মাছটিকে পর্য্যন্ত ছাড়না ।

তোমাদের জ্বালায় মাছের বংশ বাড়িতে না পাইয়া
বরং দিন দিন কমিতে শুরু হইয়াছে । জেলেরা
পয়সার লোভে জাল বোঝাই করিয়া করিয়া মাছ
ধরিতেছে আর তোমরা ঘরে বসিয়া মনের সাথে সেই
মাছের ঝোল, অম্বল, পোলাও, কালিয়া রান্ধিয়া
পেটটী ভরিয়া খাইতেছ, আর, চারিদিকে বলিয়া
বেড়াইতেছ—“মাছের মায়ের পুত্রশোক নাই ।”

কিন্তু মাছের মায়ের প্রাণের কাছে যদি একটু
কান পাতিয়া শুনিতে জানিতে তাহা হইলেই বুঝিতে
যে মাছের মা পুত্রশোকে কতখানি কাতর ; দিনরাত
তাহাদের চোখের জল রোজ কত দেশ দেশান্তরের
নদী, হ্রদ, খাল বিলের জলের ভিতর দিয়া সমুদ্রের
জলে গিয়া মিশিতেছে, কত যুগ যুগান্তর হইতে
চোখের জল মিশিয়া মিশিয়া সমুদ্রের জল লোনা
হইয়া গেল তবু এখনও তোমরা বুঝিলে না ! হায়
হায়, মানুষ এমনি নিষ্ঠুর !!

তোমরা হয়ত বলিবে খাবার জিনিস খাব না ?
ঈশ্বর ত ওই জন্তাই ওদের সৃষ্টি করিয়াছেন । আচ্ছা

নূতন উপনিবেশ ।

তাই না হয় ধরিয়। লইলাম, কিন্তু তোমরা খাইবে
বলিয়াই ঈশ্বর যদি ওদের সৃষ্টি করিয়া থাকেন, তাহা
হইলে ছারপোকা মশাও তোমাদের রক্ত খাইয়া
বাঁচিবে এই রকম বুদ্ধি দিয়া তিনি মশা ছারপোকার
সৃষ্টি করিয়াছেন মনে করিয়া তোমাদের চুপ করিয়া
থাকা উচিত । তোমরা মানুষ সবল, বুদ্ধিমান,
কাজেই তারা নিজেদের প্রাণ বাঁচাবার জন্য
অমন প্রকাণ্ড প্রকাণ্ড দেহ থেকে দু-দশ ফোঁটা
রক্ত খায় বলিয়া তাদের তোমরা দেখ্ মার
কর । তারা পালাইয়াও নিস্তার পায় না, খাট
বিছানা বালিশের কোণ মশারির ধারে খুঁজিয়া
খুঁজিয়া তাদের টিপিয়া মার, গন্ধকের ধোঁয়ায় দম
আটকাইয়া, কত রকম পোকা-নাশক পাউডার,
কপূর, টার্পিন আরও কত কি বিছানায় ছড়াইয়া
তাদের প্রাণ লও । আর মাছেরা দুর্বল ইতর
প্রাণী তাই তোমাদের সকল অত্যাচার নীরবে সহ
করে । তোমাদের কোন শাস্তিই দিতে পারে না ।
জাওলা মাছগুলো অন্যের চেয়ে একটু বেশী তেজাল

নূতন উপনিবেশ ।

বলিয়া হাত ছাড়াইবার চেষ্টা করে কিন্তু তোমাদের হাত ছাড়াইয়া পালাইবার কারই বা সাধ্য আছে, অমন যে বাঘ, সিংহ, হাতী তাহারাও তোমাদের ভয়ে জুজু। আর ভারি মদ জাওলামাছ তাহারা আর করিবে কি ? শীঘ্র করিয়া মারিয়া ফেলিবার জন্য যখন একটাকে আছড়াও আর একটা কেবল হতাশ হইয়া চাহিয়া থাকে, ভাবে আমারও আর দেৱী নাই।

(৮)

নূতন বন্ধুর কথা শুনিতে শুনিতে ইতর প্রাণীদের উপর মানুষের নিষ্ঠুরতা হৃদয়হীনতার অনেক কথা আজ তিন ভাই বোনের মনে পড়িয়া গেল। সে সকল ত তাহারা কতদিন চোখের স্রুমুখে দেখিয়াছে কিন্তু এমন করিয়া ত কখন ভাবে নাই, ভাল মন্দ কিছুই বোঝে নাই ! চোখের সামনে তাহারা যাহা দেখিয়াও দেখে নাই শুনিয়াও শুনে নাই সেই রকম কতদিনের কত ঘটনা মনে করিয়া আজ তাহাদের

নূতন উপনিবেশ ।

ছোট তিনটি বুক ইতর প্রাণীদের প্রতি করুণায় সহানুভূতিতে ভরিয়া উঠিল । সুধীরের সদা প্রফুল্ল কচি মুখখানি মলিন হইয়া পড়িল ।

তিনজনে কিছুক্ষণ নীরব থাকিবার পর অমলা বলিল—“হাঁ ভাই আমরা অনেক সময় ইতর প্রাণীদের প্রতি অগ্নায় করিয়া থাকি বটে কিন্তু তারাও যে আমাদের সঙ্গে সব সময় খুব ভাল ব্যবহার করে তা নয় । এমন ছোট খাট অনেক জীব আছে যারা মানুষের অপকার না করিয়া থাকিতে পারে না, যেখানে ষতটুকু পারে তারা মানুষের অনিষ্ট করিতে ছাড়ে না । তার সাক্ষী দেখনা উই আর ইঁদুর ।”

সুধীর হঠাৎ দিদির এই কথায় উৎসাহিত হইয়া বলিল সত্যই ত আমরা তাহাদের কোন মন্দ করিনা তবু তারা আমাদের ক্ষতি করে । এই বলিয়া সুধীর বন্ধুকে শুনাইয়া শুনাইয়া ধীরে ধীরে সে পদ্মপাঠের সেই “উই আর ইন্দুরের দেখ ব্যবহার, যাহা পায় তাই কেটে করে ছারখার” ইত্যাদি পদ্যটি আওড়াইতে লাগিল ।

নূতন উপনিবেশ ।

কমলা ধীরে ধীরে বলিল—“কিন্তু যাই বল বন্ধু শুধু শুধু ইচ্ছা করিয়া মানুষরা কাকেও কষ্ট দেয় না । মাছ মাংস আমাদের খাবার জিনিস, খেতে ভাল লাগে, কেউ খেতে মানা করে না তাই খাই, নইলে আমরা খাইতাম না, ধরিতামও না মারিতামও না ।”

বোনের কথায় সায় দিয়া অমলা আবার বলিল “মানুষকেই শুধু নিষ্ঠুর বলিতেছ কেন ভাই ? ইতর প্রাণীরাও ত নিজের প্রাণ বাঁচাইবার, পেট ভরাইবার জন্ত এ ওর প্রাণ নষ্ট করে ; সে সময় ত কেউ কাকেও মায়া করে না । বরং ইতর প্রাণীদের মধ্যে অনেকে বিনা কারণে বিনা দোষেও কত প্রাণীর প্রাণনাশ করে, কিন্তু মানুষ কখন তাহা করে না ।

বন্ধু দিদির কথার কি উত্তর দেয় শুনিবার জন্ত কমলা ও স্তব্ধীর ব্যগ্র হইয়া রহিল ।

বন্ধু হাসিয়া বলিল—“রাগ কোরনা বন্ধু বলিতে কি সে গুণেও তোমাদের ঘাট নাই । আমরা যে সকল অনায়াস করি, তাহা ত করই, তা ছাড়া তোমরা

নূতন উপনিবেশ ।

অনেক বেশী অন্য় কর । তাহা না হইলে মনে
কর বেচারি কাঁচপোকা—তা দোষের মধ্যে তাহারা
বড় সুন্দর তাহাদের ডানা রঙ্গিন, কিন্তু তোমাদের
কিছু খায়ও না, লয়ও না, কোন অহিতও করে না,
কেবল নিজেদের কোন কাজে-কর্মে মাঝে মাঝে
তোমাদের বাড়ীর দিকে আসে । তোমরা সেই
সুযোগে তাহাকে ধরিয়া তাহার ছলটি কাটিয়া
তাহাকে বিষম যন্ত্রণা দিয়া মার । কাঁচপোকা শুধু
নয় সোনা পোকা, পাথর পোকারও তোমরা ঐ দশা
কর । তোমাদের হাতে পড়িলে আর তাহাদের
নিস্তার নাই । নিরীহ নিরপরাধী বেচারিদের প্রাণ
লইয়া তোমরা লাভ কর কি ? না খানকয়েক তুচ্ছ
টিপ্ ! যাহা না হইলেও তোমাদের বেশ দিন যায়,
কোন কষ্ট বা ক্ষতি হয় না । হাঁ একথা মানি যে
তোমাদের কোটা আধকোটা ফুলের মত সুন্দর মুখ
সে টিপে আরও সুন্দর দেখায়, কিন্তু, তাই বলিয়া
এত বড় একটা পাপ এমন নিষ্ঠুরতা করা কি
বুদ্ধিমান মানব শিশুর উচিত ?

নূতন উপনিবেশ ।

এই রকম আরও কত আছে, কত আর বলিব ? সভায় যাইবে ; সেখানে মানুষেরা যে যে জন্তুর উপর •যা যা অন্যায় অত্যাচার করে সকলি তাদের নিজেদের মুখ থেকে শুনিতে পাইবে । বন্ধুর কথার আর কেহ প্রতিবাদ করিতে পারিল না । সত্যই ত বেচারী কাঁচপোকা বিনাদোষে তাদের কাছে কত লাঞ্ছনা সহ করে । তাদের সখ মিটাইবার জন্য অসময়ে প্রাণ হারায় ।”

তিন ভাই বোনের মুখ লজ্জায় রাঙা হইয়া উঠিল ।

“বাহোক, যেও বন্ধু ভুলোনা”—বলিয়া নূতন বন্ধু উঠিল ।

অস্পষ্ট স্বরে কমলা বলিল “কিন্তু নামটী ? বন্ধুর নামটী ত”—

বন্ধু বলিল—“ওঃ নামটা যে বলা হয়নি, নাম আমার অনেক । বাড়ীতে আমায় সকলে সোনা বেঙ বলিয়াই ডাকে ; তবে অন্য সকলে ভেক, মণ্ডুক, বর্ষাভূ, শালুর, প্লব, দর্জুর প্রভৃতি নামে

নূতন উপনিবেশ ।

আমায় ডাকে, তা ছাড়া সুন্দর কচুবনের মাঝে আমার বৈঠকখানা, সেখানে বসিয়া রোজ আমি আমার নূতন উপনিবেশের ভাল মন্দ গ্ৰায় অগ্ৰায়ের বিচার, ব্যবস্থা, যুক্তি পরামর্শ করি বলিয়া আমুদে লোকেরা আমায় “কচুবনের কালাচাঁদ” ও বলে ।

সুধীর বলিল—“দিদি মনে থাকিবে কি তার চেয়ে লিখে নাও ।”

বন্ধু বাধা দিয়া বলিল—“থাক্ থাক্ আর লিখিতে হইবে না, আমার কাছে—আমার ঠিকানা লেখা কার্ড আছে দিতেছি । কিন্তু তিনজনে যেও ভাই ভুল না । আগামী রবিবার বল ত না হয় সঙ্গে করিয়া লইয়া যাইবার জন্ত আবার আমি আসিব ।”

তিন ভাই বোনে বলিল—না আর কষ্ট করিয়া আসিতে হইবে না । তুমি যখন নিতান্তই ছাড়িবে না আমাদের যাইতেই হইবে পথটা একটু বলিয়া দাও কি দেখিয়া চিনিয়া লইব ? আর সভায় কি


কি বিষয়ের আলোচনা হইবে একটু আগে হতে জানিতে পারিলে ভাল হইত না ?”

• বন্ধু বলিলেন—“হাঁ হাঁ জানিয়া রাখা দরকার বৈ কি—

প্রথমতঃ, আমার বাড়ীর কথা,—তা সে চিনিয়া লওয়া বড় শক্ত নয়। তোমাদের স্কুলের ঠিক একশ হাত আগে একটা সরু রাস্তা, রাস্তাটা পার হইয়াই মাঠ, মাঠের পরেই প্রথমে মানুষে যাহাতে সহজে যাইতে না পারে এমনি ভাবে খুব ঘন কাঁটা গাছের বেড়ায় চারিদিক ঘেরা। বেড়ার পরেই সবুজ শেওলা ঢাকা একশত হাত গভীর জল। যাহাতে কোন শত্রু যদি কাঁটার খোঁচা সহ করিয়াও কোন রকমে যায়, সবুজ মাঠ ভাবিয়া যেমন পা দিবে অমনি একশ হাত নীচে জলে পড়িয়া প্রাণ হারাইবে। তারপর শুকন বেল কাঁটার ঘেরা বেড়ায় ইষের মূলের সবুজ লতা জড়ানো। যাহাতে বেঙ জাতির চিরশত্রু সাপ সে বেড়া ডিঙ্গান দূরের কথা, তার ত্রিসীমানায় যাইতে না পারে। বেড়ার

নূতন উপনিবেশ ।

ওদিকে জগতের সকল রকম মনোহর সুগন্ধি ফুলের
গাছ । তাহারই মাঝে আমার সুন্দর সুবিস্তৃত
'নূতন উপনিবেশ ।' সেখানে রকম রকম জন্তুর
বাসের উপযোগী বাড়ীর মাঝে আমার সব চেয়ে
বড় সবচেয়ে সুন্দর বাড়ী দেখিলেই বুঝিতে
পারিবে । বাড়ীর পাশে প্রকাণ্ড ময়দানে খুব পুরু
সবুজ শেওলার মকমল বিছানো কংগ্রেস মণ্ডপটি যে
সকল মনোহর কচুগাছে ঘেরা তাহার প্রত্যেক
পাতাটিতে এক এক ফোঁটা রুষ্টির জল মুক্তার মত
চক্ চক্ ঝক্ ঝক্ করিতেছে আর তাহারই পরে
সারি সারি রজনীগন্ধার গাছ, তার প্রত্যেক ফুলটির
উপর এক একটা উজ্জ্বল জোনাকির আলো ।
সভার ঠিক মাঝখানে সভাপতির উঁচু আসনের
কাছে একটা কৃত্রিম পাহাড়ের গায়ে এক একটা
বাতির আলোর মত উজ্জ্বল কয়েক হাজার পাহাড়ী
পোকা সাজান । সেই লক্ষ লক্ষ জোনাকি ও পাহাড়ী
পোকার আলোতে কংগ্রেস মণ্ডপ আলোময়
হইবে চিনিয়া লইতে একটুও কষ্ট হইবে না ।



নূতন উপনিবেশ ।

মোটামুটি সব বলিয়া গেলাম তারপর গিয়া আর সব দেখিবে ।

তারপর—আলোচনার বিষয় বলি—

১। ইতর প্রাণীর প্রতি মানুষের অযথা অত্যাচারের প্রতিবাদ—প্রধান ও প্রথম বিষয় ।

২। আমাদের স্বাধীনতা লাভের উপায় নির্ধারণ ।

৩। সবলের হাত হইতে দুর্বলদের রক্ষা করিবার উপায় নির্ধারণ ।

৪। এখনকার মত ভৃত্য ভাবে নয় কিন্তু বন্ধু ভাবে মানুষের সাহায্য করিবার প্রস্তাব ।

৫। আমাদের শারীরিক শক্তি বৃদ্ধির উপায় নির্ধারণ ।

৬। ইতর প্রাণীদের মধ্যে ধর্মের প্রচার ।

৭। ‘নূতন উপনিবেশ’ চিরস্থায়ী ও দৃঢ় করিবার উপায় চিন্তা প্রভৃতি আমাদের প্রধান আলোচনার বিষয় । তারপর উপস্থিত মত কথাবার্তা হইবে।” কথা শেষ হইলে নমস্কার করিয়া বন্ধু উঠিয়া দাঁড়াইল । বন্ধুর পাকা সোনার মত উজ্জ্বল

নূতন উপনিবেশ ।

হলদে রং ঘরের বাতির আলোয় আরো উজ্জ্বল দেখাইতে লাগিল, মনের আনন্দ তাহার লম্বা তারা-যুক্ত চোখ দুটিতে ফুটিয়া উঠিল ।

অমলা, কমলা ও সুধীর প্রতি-নমস্কার করিয়া বলিল—“বন্ধু তোমার সঙ্গে আলাপ হওয়ায় বড় সুখী হইলাম ।”

“গ্যাঙর্ গ্যাং” “গ্যাঙর্ গ্যাং”—আমি ও বন্ধু আমিও—বলিয়া সোনাব্যাঙ ঘর হইতে বাহির হইয়া গেল ।

(৯)

কমলা ও সুধীর দুই তিনবার ডাকিয়াও অমলার ঘুম ভাঙাইতে না পারিয়া একটা ঠেলা দিয়া বলিল—“এত বেলা হইল, ঘরে রোদ আসিয়া গেল, আরও কতক্ষণ ঘুমাইবে দিদি ? ওঠ স্কুলের পড়া করিতে হইবে, কয়দিন পরে রুষ্টি খামিয়া এমন সুন্দর রোদ উঠিয়াছি আজ স্কুলে বাইতেই হইবে ।”

ছোট ভাই বোনের ডাকা ডাকিতে অমলার ঘুম ভাঙিল । সে হতভম্বার মত বাহিরের দিকে চাহিয়া

বসিয়া রহিল । বারবার কমলার জিজ্ঞাসার উত্তরে বলিল “সারারাত ধরিয়া বড় আশ্চর্য্য একটা স্বপ্ন দেখিতেছিলাম, তাই এত বেলা হইয়াছে, রোদ উঠিয়া গিয়াছে কিছুই টের পাই নাই” ।

কমলা ও সুধীর দিদ্দিকে ধরিয়া বসিল—“কি স্বপ্ন দিদি বল, বলিতেই হইবে এখনি ।”

বেলা হইয়া গিয়াছে, স্কুলে যাইবার জন্ত প্রস্তুত হইতে হইবে বুঝিয়াও ছোট ভাই বোনের অনুরোধে পড়িয়া সেই বিছানায় বসিয়াই অমলা তার দীর্ঘ স্বপ্ন এক নিঃশ্বাসে সবটুকু বলিয়া ফেলিল । তাহার শুনিয়া বলিল বাঃ বড় মজার স্বপ্ন ত ! ঠিক যেন সত্যি ।

অমলা বলিল “হ্যাঁ ঠিক সত্যির মতই ত ভাই । সেই থপ্ থপ্ করিয়া আসা যাওয়া যেন চোখের সামনে দেখিতেছি, সেই জীবন কাহিনী এখনও যেন শুনিতেছি ।”

সুধীর বলিল—“আচ্ছা দিদি সত্যি হইলেও হইতে পারে ত ?”

নূতন উপনিবেশ ।

কমলা বলিল—“দূর পাগল তা কখন হয় ?
ব্যাঙে কখন মানুষের মত কথা কয় ?”

অমলা বলিল—“আচ্ছা থাম দেখি সে কার্ডখানা
আছে কিনা, তাহা হইলেই বুঝিতে পারিব সত্য
কি মিথ্যা ।”

একটু খুঁজিতেই কার্ডের মত একখানা কি
চাদরের ভিতর হইতে পাওয়া গেল ।

অতিমাত্র আগ্রহের সহিত তিন ভাই বোনে
সেখানি পড়িয়া দেখিল, তাহাতে লেখা রহিয়াছে—

সোনা ব্যাং ।

পদ্মপুকুর,

কচুবন,

নূতন উপনিবেশ ।

বিস্মিত হইয়া তিনজনে মুখ চাওয়া চাওয়া
করিয়া বলিল—“একি ভাই !—এ তবে স্বপন ?
না সত্যি ?”

